

16373

1.


Ephe

Ephe verst endig tro stlich leer

vber das wort. Sanct Pan-
lus. Der mensch sol sich selbs
probieren / Vñ also vñ dem
brott essen vnd von dem
kelch trincken. Du Hall
Im Intall von Soc.
Jacob Strauß ge
predigett.

M. D. XXij.

Jonas Cyprian
Kauff vnnnd lies/
Es wirt dir gefallen.



Allen liebhabenden des heyligen Euangeliums / vñ
warhafften Christen / wunsche ich Jacob
Strauß / durch Christum / göttliche
gnad / fride / vñnd frewd / ym
heyligen geyst.

Ich bytt eyn yden verstendigen Leser / der nach
geschribnē predig / myr / ynn Christenlicher lieb / nit
zuverargen / oder mich / eyniger vermessenheyt / ver
denckē / das ich / vnter meynem / kleyngacht namē /
etwas yñ geschriffte laß aus gehen / die weyl / der al
mechtig gott / so tapfferliche / gotgelerten / vñ hoch
erleuchten / lerer / aufferweckt hat / der ganzen Euā
gelischen erleuchtung / die aller fruchtparisten ver
kunder / vñnd beschreyber / das ich wol billich mich
selbs / yñ mir / schweygent / enthielt. Ich weyß auch
ongezweyffelt igt / bey allen Euangelischen fromen
Christen / der selben / grossen liechtern / so menigfal
tig wol schöner / außgefürter / Christenlicher leer / vñ
kostbarlichen büchlen / das ich mich / straff würdig
zell / zu reden / oder schreyben / dann mir schweygen
baß anstünd / vñd billich weyßlicher geziret. Doch
hab ich / des ich mich behelff / vñnd eynem yden bes
cheydnen / verhoffgnüg zethun / dan ich aus Chris
sti vnßers herren gebotes zwang / mich schuldig er
kennen eynem yedem / der meiner dienst begert / mich
willig / vñnd bereyete / mitzutheyllen / hierumb als die
gottlich warheyt / der ich nit kan oder mag widers
streben / vñnberwintlich mich gezwunge / das heyl
ig euangeliumm offenpar / vñnd on all menschlich

forcht / vor ettelich tauſent fromer Chriſten zu hall
ym Intall / das vorgangen iar zu predigen / vnn
hernach aus dem graufamen wütten / das die fürſte
der priester / vnn der phariſeer / widder gott / vnn
ſeynen geliebten ſoen Chriſtum / das heylic euange
lium zu vertilgen / kleglich vnn erpermlich erhebt /
vnn mitt hilff herodis / vnn pylati nachvolger /
(yhrs gedancs) ynn ettelich moß volſtreckt / ich v
trieben vnn veriagt byn worden / vnn also das
gottliche wortt / vnn Chriſtenlich leer den hunge
rigen kindern gottes / aus yhrem hals gezuickt vnn
geriſſen iſt / Haben mich die ſelben fromen Chriſten /
ſo hoch vnn faſt erpetten (vnd hab mich auch des
verbunden) ettelich fürnemliche leeren / von mir eyn
ſelltiglich geprediget / ynn geſchriſt zu ſtellen . Vñ
wie wol mir ſchreyben bißher frembd vnn nicht ge
preuchlich iſt / hab ich doch / fromer leutt byt vnn
meyne zu ſagen / nach vermögen / ſtatt zu thun / die
nach volgent predig vnd leer / dem almechtigen got
zu gefallen vnn allen geenſtigetten gewiſſen zu
dienſt / ynn geſchriſt eroffnet / mit der ich mich / vñ
allem dem das (aus gottes gnad / hernach vñ myr
aus gehen wirtt) eynem yedem fromen euang
eliſchen Chriſten / nach ynhalte des heys
ligen euangeliums / zu ſtraffen / vnd
zu beſſern / gätz vnterthenig ers
geben vnd bevollen wil ha

benn. 2c.

Kemburg ynn ſaren am fierten tag Auguſt .

Anno M. D. 22.

A ij

Eyn kurtze sermon von dem sacrament des leibs
vnd bluts vnfers herrn Christi/ geprediget vō Doc-
tor Jacob Strauß am hohen pfingstag zu hall/ ym
Jntall. Anno 1. 5. 22.

Eynē ersamen Rade/ ganger gemeyn/ vñ nach-
perschafft/ da selbst/ zugefallen/ vnd auff yhr embs-
sig hoch byt/ in gschrifft gestelt/ wie hernach volgt.

Der heylig Paulus sagt yñ der hentigen epistel/
wie yhr gehört habt. Der mensch soll sich selbs pro-
biern/ vnd also essen von dießem brod/ vnd trincken
vom kelch/ ist vill iar aus dyßem trostlichen wortte/
eyn grausam/ notzwang/ vnd verzweyflung/ allen
geengstigten gewissen/ vnd frumen Christen/ eynges-
bild/ von den elenden sophisten/ die durch yhr leer/
gottes trost vñnd süße zuversicht/ ynn schrecken/
forcht/ vñnd zweyffel verwandlen. Aber groß hoff-
nung vnd trost haben sie fürgeben/ auff die heyligen
zu ehren/ vnd tyrannischen menschen gesatz/ die sie
dann zu eyneim hellischen strick der gewissen/ vñner-
leidlich auffgelegt habēt/ damit/ das der arm Chris-
sten mensch/ nit mehr mit begirigem/ freyē/ herten/
zu dem frölichen tisch vnfers hern/ sich möcht ver-
trawen/ vñnd den leyb vnfers gottes/ vnd sein heyl-
ligistes blutt/ zu sicherer heylbertickeytt empfangen.
Vnd haben sich hie erhebt/ die vñnmöglichen mēschē
gepott/ der beicht dem eygnen priester/ sind auch er-
füllt alle hohen schulen/ klöster/ vnd die gantz welt/
mit bücher/ disputation/ sumisten/ vñ lerer/ die doch
der sachen nicht eyns kunnē werden. Vnd so all ihr

ſchreyben/ſeren/diſputiern/predigen/vnnd ſchreyen/
mit güttē euangelichen vſtandē wirt angeſchawet/
befundt es ſich der ſelbigen ſpeyß /ynn diſem ſacra-
ment / ganz widerwertig / auch verfürlich / vnd auß
dem vater der lügen her flüſſent. Dann wehr mag
die kyt / des teuſſels / ynn diſen büchern / vnd predi-
gen / gnügſā verwundern : yñ denē die ganz frucht
des hochwürdigſten ſacraments / auff gehet / vnd
das leben der armen ſeelen / ynn todt gewant iſt.

Was möcht gewiſſers zum leben der genaden vns
erheben / dann ſo yñ glawben / warhaſtig der leyb
Chriſti / zuvergebung der ſunden geessen / vnnd ſeyn
blütt getruncken wirt : Wo aber nitt nach rechtem
glauben (wie des Entchriſts prediger lere) das ſa-
crament empfangen wirt / iſt keyn ſchadhaffter tod
der armen ſeelen. Dann Chriſtum nit laſſen Chri-
ſtū ſeyn / was verzweyſleter handlūg das ſey / welle
wyr izt auff das kurz iſt beſehen / vnnd von Chriſto
gelernet werden / wie er ſeyn wirtſchafft bereyt hatt /
auch was geſtalt / er will ſeyn geſt zu diſem tiſch /
geſchickt / vñ vor bewertet habē / damit ewr andacht /
auff heutt / vnnd ſo oft yhr / zu gotts tiſch werdet
gehen / on forcht / zweyffel / vnd grißgrammē der ge-
wiſſen / mit frölichem beriebigem vñ luſtigem hertze
zu ewr ſelickeyt Chriſtum mögen empfaſen.

Erſtlich wollen wyr den falſchen tyranniſchen ver-
ſtand der wortten des heyiligen apoſtels / wie ſie die
verkerchten lerer vnnd prediger / außgelegt haben /
als vert erblich / verfürlich / vñ vñchiſtenliche glaw-
bens / verlaugnung.

gang grunelich von vnsern oren vnnnd hertzen anse-
schlahen/ doch wil ich ewr lieb zugezeugen nemen/
das von den selben falschen propheten/ vnd fürnem-
lich/ vō den genatirten phariseern/ dē petel münchē/
die v̄gweyßlet versfürung/ gemeyner Christenheyt/
eyngetruckt/ vnd also beschlußlich wie nach volgt/
geprediget ist.

Welcher mensch nit all seyn sund gerewet/ vnnnd ges-
beychtet hatt/ vnnnd das sacrament also empfachet/
der selb nymbes yhm zu dem vrtail/ des ewigē tods.
All sund müssen volkumenlich gerewet seyn/ vnd ein
yedliche ynn sunderheyt.

All vmbstend/ müssen auch mit gangen volkumenē
rew vnd leyd/ vnterschiedlich erwegē/ vnd bedacht
werden.

Dem nach/ müssen die sund wie gerewet/ also auch
gebeychtet werden.

Eyn sund nach der andern / mit allen vmbstenden/
ganz vnterschiedlich/ muß auch dem beicht vater/
angezeygt werden.

Die vmbstend der sund/ wer/ mit wem/ yn welliche
person/ weñ/ wie oft/ wo/ aus was lust/ vō welcher
vrsach/ oder wie hart angesochten/ vñ der gleichen.
Auch wehr die beicht teilt/ der hab die sach gar ver-
derbt/ vnd helfff alles nicht/ was er gethan hatt.

Vñ so sich der mensch keyner todt sund mehr schul-
dig zellt/ vnnnd also von dem beicht vater/ vō allen
sunden absoluiert/ dan wirt ehr erst zum sacrament
geschickt/ vnnnd probiert.

Das habē die elenden v̄fürer/ aus den wortē Christē

durch sanctū Paulū angezeygt / wie igt gesagt ist/
falschlich gezogen. Der mensch soll sich selbs pro-
bieren / vnd also von dem brod essen vnd vom kelch
trincken / vnd dieselben entlichen beschluß eyngesürtt.
Wehr nicht ganz vñ allen seynē sunden / durch seyn
eygen rew vñ beicht / wie oben steht / gereyniget sey/
der nemb ym selb / das sacrament zu dem ewigen tod.
Nun ist eynem yeglichen frumen Christen / yñ warē
rechtem glawben / die obgemeltē falschen / vnd yre-
renden spruch leichtlich zu erkennen.

Darumb wollen wirs mit heller / kiechter / warheyt /
wurzlich aufreutten / vñnd ynn die grundlos helle
sencken.

Erstlich wehr mag sein sund all vnd yglich berewē/
so doch nit müglich ist / die sund all zuerkennē / wie
David sagt / am 18. psalmē. Delicta quis intelligit?
Wer vñstet die sund all: Vñ Job am 9. Verebar om-
nia opera mea. Ich hab besorgt / all meyne werck.
Vñnd darumb müste der mensch / vnterschiedlich
all seyne werck berewen / das vnmüglich ist.

Zum andern / vnd das der Christen mensch also gar
gereyniget ynn seiner rew / vnd ehr nit / zu dem tisch
Christi / zulessig sey. Ist eben also vill gesagt / als
wen ich dich / zu meynem tisch lad / da ich dir bereit
hab vberflüssig / vnd vill köstlicher richtē / so müstū
vorhyn / ganz boden voll seyn / vñnd wo du eynigen
lust zu essen oder trincken noch hast / bistu nicht ge-
schickt zu meynem tisch.

Was sollt myr anders hie zugemessen werden / dan
das ich frum lewett zu mir geladen / verschympffen /

vnd verspotten wolte/ oder von natur/ wurd ich ein
grosser pazeter narr geachtet/ dan was will d essen
der vorhynn vol ist: Es ist on frucht alles/ was der
voll mag isst vnnnd trinckt.

Also wenn du des rewen selbs bekumen magst/ der
ganz vollkumenlich dich lediget von allen deynen
sunden/ ist dyr nit not/ den leyb Christi zu essen/ der
für dich hingeben ist ynn todt/ vnd zu trincken das
blütt/ das vergossen ist vmb vergebung der sundē/
Dann hie wirt niemant gespeist/ denn allein die/ die
ynn warem glawben yhr eygen sund befynden/ vnd
hungerig sind der vergebung/ die Christus bey disē
tisch zugesagt/ mit seynē eygnē fleyisch/ vnnnd blütt
vngezweyfelt besteeet.

¶ Zum dritten. Hie wirt vernomē/ wie die versfürer
der ganzen welt/ so gar stock blind/ vnnnd vngelert
sind/ vnnnd eyn eynigs wort/ noch nie recht verstan-
den/ oder geprediget habē. Als der tobent/ wütet/
elend/ münch/ zu Schwarz/ auff seynē vnchristlichē
Holzschuchen/ die ganz vasten/ gelogen hatt/ wer
Lutherische büchlen bey yhm hab/ vnnnd zu gottes
tisch gehe/ der sey des taußfels ewiglich.

Das heyst Christenleut gelernet/ wie es der teuffel/
haben will. Ist es doch noch nie befundē mit key-
ner warheyt/ das die selbē büchlein ketzerisch seyen/
oder wider das heylig euangelium etwas fürtragē.
Ach der elend vn synnig münch verstehet eyn wort
nit/ was euangeliiū/ sacramēt/ oder glaw/ sey/ dā wo
eyn sunckē Christenlichs verstand yn ym wer/ wurd
er Christenlich leerē/ nit so vnnatürlich verwerffen.

Zum vier tten

¶ Zum fierten/ Also werden die armen/ hungerigen
kinder gottes verhindert/ an yhrem heyl/ vnnnd von
dem tisch yrs vaters verwißen/ das keyn mēsch mer
schezt/ oder gleybt mit rechter ordnūg/ das sacra-
ment zu empfaßen/ die weyl die volkommen rew/ keyn
nem menschen möglich ist.

¶ Zum funfften/ Vnd demnach muß Christus bey
den tyrannischē spitzgeysten/ nit Christus seyn. Das
sacrament/ muß nicht sacrament sein. Die zusagung
gottes/ wirt auch hie gelencknet/ vnd wirt ynn sum-
ma/ alles verkeret/ zu eyner verzweyffletten vermale-
deyung/ was Christus/ das warhafftig zeychen/ yñ
dissem nachtmal/ zu ewiger benedeyung/ vnd selig-
machūg zugesagt/ vnd verordnet hatt.

Das ist grausam zu hören/ vnd ist doch offenbar-
lich vor augen/ dann wan Christus hie die sund nit
soll vergeben/ wie die zusagung gottes versprochē/
bey dissem sacrament/ vestiglich ynhalte/ vnnnd dem
menschen der todt zusetzt/ bey der versprechung des
lebens/ ynn dem wort Christi do ehr spricht/ das ist
meyn leyb/ der für euch hyngeben wirt/ das ist meyn
blutt/ das vergossen wirt/ zu vergebung der sundē/
wie kan dan Christo seyn ampt erhalten werden?

Ist hierumb vnberwintlich war/ das die gotlosen
phariseer/ nicht wollen Christū lassen Christū seyn.
Ach wie erbermlich vñ verdamlich das ist/ mag eyn
yglicher fromer Christ woll beherzigen.

Dann mag es anderst nicht verstanden werden/ soll
der mensch ynn seyner rew/ gereyniget werden/ vnd
dem nach/ das sacramēt empfaßen/ so ist keyn auß-
wirkung Christi hie/ dan er nit komen ist zu suchē

vnd selig zu machen / die gerechten vnd gereynigeten / Aber die Sunder von sunden ledigen vnd reyn machen . Aber die falsch gelerten / wissen das Job nit gewist hat / vñ keyn geschriffte erleyde mag. Sā also sagt der heylig Job am .14. Wehr mag reyn machen / den der empfangen ist von beslectem samē / dann alleyn du / der alleyn bist.

Vnd gott durch Esaiam am 43. spricht. Ich byn / ich byn / der deyn sunden (alleyn mich selbs angesehen) abtilgt vnd vergibt . Die substanzlich aygē schafft der gotheit / wirt nit an vrsach hie so vnterschiedlich außgetruckt. So gesprochen wirt / der du bist / vnd ich byn / ich byn dan gott alleyn yñ Christo die sund vergibt.

Nun haben die verfürten elenden schreyer / eyn andern hellischen strick gefunden / darynn vill tausent menschen gefangen / yñ verzagter weyß / ihr heyl vñ selickeit verlorn haben / vnd nit mūglich ist vmbzugeen / wehr ihren lügen auffmerckt vnd glaubē gibt. Als sie die rew so groß vnd vnmūglich auch dem Leyen ganz vnuerstendig auß speyen. Leren sie her nach auch mitt vill erschrockenlicher vnnatürlicher weyß / die beicht sey nach aller streng / wie oben angezeigt / vor dem sacrament notturfftig. Vnd so sie dē armen volck keyn trost mehr lassen / geben sie yrer teuflischen tyranny eyn scheyn / vñ verblāmēs also. Die weyl der gemeyn Christen mensch / seyner rew / keyn ordnung weyß / das er dan eylens zu der beicht laufft / trost / vñ hilf / vñ vnterricht vō yhm empfacht / so werde dan auß dem vvolkommen rew / eyn rechte volkumme rew. Vnd also loben sie yhr tyrannisch

fleischbangt die erdicht gottlos beichte.

Vnd das du des teuffels werck/ vngeweyset hies
rinen befinden mögst/ so merck eben auff/ was dieser
vñ fürlicher leer mit laufft. Sie schreyen die bischoff
vñ pfarrer. Es soll eyn yglicher seyn eygne pries
ter beichten/ vñ erheben das geistlich trumb recht/
mit grossem vnerhörtem schrecken / vñ weyst noch
niemants/ wer der eygen priester ist/ der eyn igliche
Christe/ sinder zugeeynet sey. Dan so du es recht
besichst/ so müst du der pfaffen eyge dienstlich knecht
seyn. Sye solle dir auch/ weder tag noch nacht kein
rwe lassen. Byß sie deyn seel/ leyb/ vñ güt/ vñ
yhren tyrannischen gewalt bringen.

Also wollen sie auch nit/ Christi vnseren Herren pries
ter seyn/ dan Christus will alleyn priester habē/ die
knecht vñ diener der gemeyn sich achten vñ erfunda
werdē. Aber warlich mit allen kreffte sind sie worden
die priester/ des abgotts Baal/ das also vill gesagt
ist auß hebreyscher zung/ als hians/ ant deuorator/
zu teutsch/ einer der auff gynt/ oder ein schlucker ist.
Dann all yhr hertz/ maul/ vñ beitel außgedent auff
gynt/ auff deyn gellte/ weyl du eyn vierer hast.

Also das vngeweyset die beweynet klaghafftig
prophecey/ am buch Trenoram am 5. erfüllt ist. Wir
haben müssen vnser wasser / von yhn vñ sylber
kauffen. Dann alles das der seelen heyl antreffens
ist/ mustu vñ sie kauffen.

Sye thuent auch noch armen / noch reichen/ nicht
vñ sinst/ wie dan durch den propheten Malachie
am ersten gott saget.

Keyner thet eyn thüren zu/an meynē hauß/on sundern sold oder bezalung. Vnnd so du ynn den helischen kercker fallest/yhrs vnersetlichen geys/dann kumestu herauß nicht/die weyl du den aller letsten vierer/noch ym peuntell hast.

Dar gegen haben die bettel münch/die bischoff vñ pfaffen vberschreyen/vñ nu mehr die ganz wellt vnter yhrer beicht gezwang ergriffen/das mā sie müß erkennen/als die rechten beicht herren/die wissen die rechten griff/all winckel deynes herten zu ergrunden/vñ mag nicht vnerfragt bleiben/das der teuffel vnnd setlich schalckhafftig münch/yñ aller bößheit erdencken mügen/vnd was du yñ aller bößheit nie gewist hast/das mustu in der elendē beicht erst lere. Do sitzen dann die andechtigen heyligen vetter/an gottes stadt(wie luzifer)vnd herschen gewaltiglich vber deyn gewissen/haben auch yhren wollust/nach yhrem vnschambhafftigen herten/dye armen weyblein/iungfrawen/vñ iungling/zu fragē/das sie ynn yhrem fleysch/noch geyst/nie befunden/vñ erkant habent. Demnach sind sie getrewe beicht vetter/die dem armen sunder/mit seynē sunden/auff bann helfen. Da wo nicht sund ist/leren sie vnnd machen sund.

Das zeugen auch wol an/bey etliche yhre klöster/die beicht winckel/angweiffel vnreyner/vnd schadhaffter/dan kein hürenwinckel/ynn der ganze welt. Es wissen die wol/was ich sag/die zu Schwarz erkant seyn. Vileicht weys die reyn iungfraw/bruder Michel/mit seinē schneweyssen armē/nichts da vñ/Das sich got vber die ellenden/ellendē leut erbarm.

Vnd die selben heyligen gleyßner/nemen keyn gelle/
vnd thuent allen vleyß ob dyr/Aber schaw / das du
gütt groß vnnnd sayst visch/vnnnd ein halben gulden
oder der gleychē/vnd groß flaschē des besten weins/
yhn zu schyckest/domit sich die arbeitsamē/starcken
recken laben/vnnnd bistu also ganz wollfeyll / auch
der sund ganz ledig / weye der hund der flöhen ym
augsten.

Dem gewopffaffen hettestu vileicht eyn serer müssen
geben / vnnnd werest nit halber so wol versüret/vnd
gelert worden

Also was der schaur/der bischoff/vñ der pfassischen
geytz/nit erschlagen hatt/fressen darnach die haw
schreckē/wie man list ym büch des außgangs Israe
hels/auß egipten am 10.

Ich hab woll so vill auff die eyn predig am hohen
pfingstag von dießer verfürlichen tyranny nitt ge
sagt/aber ynn andern predigen/vō der verdamllichē
beicht/ das vnnnd anders angerzeigt / das dan alles
hie her reicht.

Dann do mit/das/das leben bey dem tisch Christi/
ynn todt verkert werd/hat der böß feynt/zu vwick
lung/vnd ewiger gefencknis/ den hellischē handel/
ynn alle wellt durch die vnmilden gottlosen beicht
hengst geweltiglich eyngefürtt.

Ich will aber hiemit nitt außgeschlagen haben /die
gerecht beicht/die on forcht / gezwang/vnd versü
rung/mit begie. igen freyem hertze/geschehen mag/
zu der niemant gezwungen oder genöttiget wirrt.
Vonn der ich auffß peldist / eyn büchleyn auß will
lassen geen/vnnnd euch auch zu stellen/ynn dem ich

dem ellenden verfürten erzpharister zu Schwaz /
vmb seyn / wider gott vnnnd das heylig euangelion /
geschrey / nach meynē abscheyden vnd myr zu ruckē
beschehen / seyn holzschuch ettwas beschnaittē wil /
vnnnd euch damit ym ewrem glawben steroren / vnd
güt fůrdung geben .

¶ Nun mag eyner yeder frumer Christ on yrrung erken-
nen / das die voreyngeführten der sophisten / vermüctē
predigen vnd leeren / die ganz welt dahyn gezwüge
haben / das auch die fromen Christen / die der sache
ganz Christenlich gern wolten recht thun / vnd also
zu gotes tisch geen / werden die aller vngeschicktestē
vnnnd können yhn nymmer gnüg beichten / vnnnd so sie
yetzt hynzu sollē nahen / so ist der teuffel mit gewalts
da / vnd tobt sie yñ yrrung der gewissen / herflüssen /
auß den köstlichen langen beichten vnnnd schönen
beichtbüchlein .

Also werden sie vmbgeben mit angsten / wie sie nit
gnüg gebeicht haben / vnnnd haben auch das nit ges-
agt / vñ yhens nit / mit disem vñ yehnem vmbstand
gebeicht. ¶ Nun ist die stund hie / vnd müssen hynzu /
der pfaff hatt nit der weyl / vnnnd hab ich noch nit
gnüg gebeicht . Vnnnd hatt die arm gewissen / keyn
größer nott / das ganz iar / dan zu der stund / yñ der
gott dem menschen die sicherist vergewissung vnnnd
frewd bereit hatt .

Ach wie wissen so vill tausent menschen woll / was
ich hie getrewlich anzeig. ¶ Nun lieben brüder / wels-
len wyrr vnser oren vnnnd hertz / mit gütem vertrawē
zu got auffheben / vnd mit David tröselich sprechē

Wyr wollen vñ vnß reysen yhre band / vñd vñ vnß
werffen yhr Joch / Wie am andern psalmen steht /
Das ist / wyr wellent der forchtsamē versürten leer /
Keyn auff mercken haben / vnnd alle erdichte / tyrans
nischen menschen gesetz verachten / vñs zu dem was
ren / lebendigen / wort vnßers Herren Christi hallten /
der niemants schreckt / vñd ynn engsten verlast / aber
tröstlich ynn aller süßickeyt zu yhm berüfft .

Das wir aber seynen wortten anhallten mögen / vñ
vñs daruon nit schrecken lassent / vñd stercker auch
ynnütlicher ynn gott verharrent / des haben wir eyn
vñberwintlich weer / so wyr seyn gotlich wortt / yñ
yhm selbs anschawen / vnnd an nehmen / wie es von
got der ewigen vñtrieglichen warheyt außset. Also
das wyr gott nit seucken / vnnd keyn zweyffel / noch
verdecktlicheyt / seiner wort gedencen. Dan als der
mensch / die hochst festerung gott zu legt / der gote
seucknet / odder lügen schellten wurt / also ehret der
frum Christen got / am aller höchsten / der seyn wort
vber aller creaturen sagen / krafft / gewang / vnnd
vermögen / stett vest / vnnd ungezweyfflett / als dye
ewig lebendig warheyt / glawbt / vnnd erkent / wye
Christus selbs sagt / Hymel vnnd erden werden hyn
geen / aber meyne wort werden nicht vergeen. Das
ist gesagt. Hymel vnnd erd / vnnd all Creaturn / sind
schwach / vnnd vñvollkumen / vnnd bleiben ynn yhn
selbs nicht / aber meyn wort / verharret vñd bleibt /
on allen abgang / vñd gebrechen / ymmer vñd ewig
lich. Vñnd ym psalmen spricht er / das er es selbere
nicht wil wider lauffen / was er ein mal geredt hatt.

Que procedunt de labijs meis non faciam irrita/ zu
teutsch/ Die wortt die auß geent auß meynem lebze/
mach ich nit zu nichte.

Darumb yñ disem val/ wollen wir allein seyn wort
anschen/ vñnd dem alleyn glawben setzen. Do wer
den wir mit freuden vernehmen / wie Christus seyn
hoch kostreich nachtmall bereit hatt.

Anfenchlich fass die wort woll/ die der heylig Pau
lus/ nach der drey euangelisten beschreibung/ yñ der
heuttigen epistel angeygt. Ichs hab empfangen/
vom herrn/ das ich euch auch gelernet hab/ dz Ihes
sus yñ der nacht/ als er hyngē ist worden/ hat ge
nommen das brott/ vñnd als er hat danck gesagt/ hatt
er es geprochen / vñnd hatt gesagt. Nempt hyñ/
Essent mein leib/ der für euch hyngē wirt. Das
sollt yhr thun / yñ meynen gedechtnus. Eben der
gleichen/ hat er gethan/ mitt dem tranck/ sprechend.
Das tranck ist das new testamēt/ yñ meynem blūt/
das thuet so offte yhrs thun werden/ yñ meynen ge
dechtuns.

Die zweent euangelisten/ Haben dazu gesetzt/ Mats
theus. Das für vill menschen vergossen wirt/ yñ dē
gebung der sunden/ Marcus/ Das für vil vergossen
wirt.

Also Haben wir/ das der leib Christi/ vñnd sein kost
barlichs blūt / ist an dem hohen nachtmall vnser
speys vñnd tranck. Vñnd ist bereytt nach dem ge
schmack vñnd eygenschaft/ als der reyn/ zart/ iuncē
frewlich leib/ yñ todt vñ marter für vns gebē ward/
vñ wie sein vnbeslectes heiliges blūt/ für vnser sund
vgossen ist. Vñ so das lebēdig gepot hie mit laufft.

Der sollte

Das solte yhr thun yn meyner gedechtnus / ynn dem
württ angezeigt / all vorbereitschafft / vnnnd rüstung /
nach außgetrückten willen vnßers herrens . Dann
alleyn will hie Christus gessen vnd getrúncken wer-
den / mit eynem geubten / auffmercklichen glawben /
das ist / das wyr glauben / vnnnd gegenwertig dißem
sacrament / mit allem vleys gedencen / das der leyb
Christi / für vns gemartertt / vnd ynn den todt gebe /
vnd das seynheyliges blütt / für vnser sund vggossen
ist worden . Vnd das er / zu eynem gewissen / vesten /
vnnnd ungezweyffelten tzeichen / der vergebung der
sunden / seyn warhafftiges fleysch vnd blüt / vns zu
eyner speyß vnnnd tranck / zu verordnet hatt .

Vnnnd das ist der ganz beschluß vnßers glaubens /
das wyr bekennen vnnnd glawben / das Christus / der
war natürlich son gotis / vnnnd marie kindt / für vns
gestorben ist . Vnnnd württ ynn dem glawben ange-
fangen / volstreckt / vn selicklich volpracht / die ganz
sum / aller Christenlicher wercken . Dann alleyn ynn
dißem glawben / werden wir gerecht gemacht / vnnnd
von vnßern sunden gelediget / vnd hebt an Christus
ynn vns zu seyn / vnnnd wir ynn Christo . Vnnnd das
vermag dz wort Christi / do er sagt Ioannes am . 6 .
das ist das werck gottes / das yhr glawbt / ynn den /
den er gesant hatt / vnd wie / oder warumb / yhn gott
der vater gesant hatt / sagt er darnor am 3 . capittel .
Gott hatt seyn son gesandt / das die wellt geseliget
werd durch yhn / vnnnd Luce . 22 . Des menschen son
ist kumen seyn seel zu geben / zu eyner erlösung für
vil menschen .

Nun möcht eyn auffmerckender fromer Christen

C

menschen / schier versteen / was das nachtmal vnser
Herren ynhelet / auch was die prob vnd bereytschafft
soll seyn / von der Paulus sagt . Das wollen wir be-
schlußlich / also weyter anschawen .

Christus hatt durch seyn todt vnnnd blütvergießen /
die welt von sunden erlöst / vnnnd alleyn genüghen /
für die sund / wie Paulus sagt an der ersten epistel zu
Thimotheo ym andern . Er hat sich selbs geben die
erlösung für vns / vnd sein todt yn vnser erlösung /
wirckt so lang ym glawben / ynn vns / byß wir von
allen sunden gantz frey gelediget / die ewig selickeyt
durch Christum erreichent .

Aus dem volgt / das wir yn teglicher / stetter yebüß
vnser glawben / als die on sund nit leben / zu Chris-
to fliehen / vn dringen müssen / dan Christus allein
ym glawben rechtfertig macht / wie Paulus sagt /
zu den Römern am viercten . Dem der do glewbt
ynn den / der gerecht macht den gotlosen / dem wirt
seyn glawb geacht zu der gerechtickeyt .

So nun die wircklicheyt vnser seligmachüß alleyn /
von Christo herfleusset / vnd vns durch seyn leyden /
todt / vnnnd blütvergießen / zu geeygnet / vnd Chrüs
sagt / an seynem nachtmal . Nembt / vnnnd esset / das
ist meyn leyb / der für euch hyngeden wirt . Nembt
hyn / trincket / das ist mein blüt / das vergossen wirt /
zu vergebung der sund . Ist keyn zweyffel zu haben /
Chrüs / so er vns speyst mit seynē leyb / vnd trengt
mit seynem blüt / so ist er auch ynn vns vernewen /
das werck der erlösung / vnnnd teilt vns mit / das ehr
mit seynem marter / todt / vnnnd blütvergießen / vmb
gott seyn hymelischen vatter verdient hatt .

Vnd dißes wirt alles volbracht ym glawben/ den wir zu Christo müssen haben. Dañ der leyb Christi vnd seyn blüt/ ist alleyn hie an dießem nachmal/ vnd wirt genomen/ vnd empfangen/ als das aller sicherist/ vnd warhafftigist zeichen seynes barmhertzigen zusagung / vns ym glawben die sund zu vergeben/ vnd selig zu machen.

Hierumb sagt der herr nit/ das ist meyn leyb/ der vn schuldig empfangen vom heyligē geyst/ geboren aus Maria der iungfrawen/ oder yñ dem ich mirackel gethan vnd geprediget hab/ von todt außfersteen vñ gen hymel faren wirt/ oder der gleichē. Aber er sagt/ nembt/ vnd esset/ meyn leyb der für euch hyngeben wirt. Da er vns erhebt ym glawben/ zu gedencken/ vnd zu erkennen/ das werck vnser erlösung/ yñ das seyn vnschuldigh / vom heyligen geyst empfangnus / vnd geburt auß Maria der iungfrawen/ vnd alles das vor/ vnd nach volgt/ Christo/ von gott / von ewigkēyt verordnet ist/ das wir got yñ dißem sacrament alleyn erkennen sollen/ als vnser gerechtikeyt/ vnd vergebung der sunden.

Nun mehr schlenst sich auff/ auß angezeigtē gründe/ das wort Pauli. Das sich selbs der mensch sol probieren/ vnd also zu gotts tisch geen. Vnd das soltu also vernehmen / auß dem wort/ nach volgent/ do er sagt. Der das isset vnd trincket vnwürdig / der isset vñ trincket yhm selbs das gericht gottes / als er nit vnterschiedlich richtet/ dē leib des herrē. Vñ das ist die bewerūg sein selbs. Vnterschiedlich in vestem glawbē erkennen vñ bedenckē/ was hie anzeigt wirt yñ dē leib vñ blüt vnseren herren/ vñ also wirt die recht prob/ wie nach volgt/ practiciert. Cij.

Bestlich müßtu dich also probieren/das du empfindest
eyn ungezweyseten glawbē yñ dir/das Chrüs
ynn seynem eygnen leyb vnd blütt/gegenwertig dir
geben wirt/als deyner seelen speys vñnd tranck.

Sum andern/das Christus hie ynn seynem leyb vnd
heyiligsten blütt/ sich selbs dyr gibt/zu vernewung
der außwirkung seynes leydens/sterbens/vnd blüt
vergießens.

Sum dritten/ist das eyn güttiger vmbstant der pro
bierung/ynn dem der teuffel gar vberwunden wirt/
vnd all versürllich leer zerstöret. Das du vesticklich
halltest vnd glawbest/das dich niemants mag reyn
vñnd gerecht machen/von deynen sunden vñnd gar
ledigen/dann alleyn Christus/das dir dan nit mag
widderfaren/dann alleyn durch das mittel/das der
leyb Christi hyñ geben ynn todt vñnd das blütt zu
vergebung der sunden vergossen ist worden.

Sum viertē. So du die drey kurtzer auffmerckūg wol
ym glawben gefast hast/dan mag volgen/vñ bleibt
nit aus/die war recht rew/vñnd erkentnus/deyner
sunden/vñnd wirt gar ynn kurtzer weyl/gantz vol
kumenlich volbracht.

Dann von stundan würdestu befinden/wie groß/vñ
geferlich/dein sund dich beschwerē/vñ nider truckē/
von gott/die weyl niemants hatt mögen noch mag
etwas genügthun für deyn sund/dan alleyn der tod
vñnd das blüt vergiessen/des eyngelbornen son gots
tes/Vnd ynn der betrachtung kumbt/vñnd beweget
dich/die recht fruchtpar rew deyner sunden/so du
deyn gewissen/nit ynn dir selb contemplierest vñnd
anschawest/aber yñ dem leyden/wunden/todt/vnd

bluttvergießens/deynes erlöfers/vnd heylmachers
vnfers herren Ihesu Christi.

Zum funfften/so probier dich also/mit eynē kurtzē
gedanken/das deyn sund dir nit möglich sind/all/
vnd yglich/auch die aller kleynist/also zu berewen/
das got durch deyn eygen rewen (Ja wenn du aller
wells leyden/vnnd rewen hettest) dir die selben vers
geben werd. Aber alleyn ynn dem tod seynes suns/
wirstu wider mitt yhm durch seyn barmhertigckeyt
vsünet. Als Paulus sagt zun Römern am funffte.
So wyr gottes sind sind gewesen/sind wyr ym wiß
versünd/durch den tod seynes suns. Vnnd zu den
Corinther ynn der andern epistel am funfften. Alle
ding komet aus got/der vns yhm selb versünt hat/
durch Ihesum Christum.

Wo aber du wille/deyn sund lang mitt yhren umb
stenden ynn dir selbs/vnd nit yñ Christo anschawē/
so wirstu verdamlich verzweyflung finden/odder
von newen an/ein kugel der sunden vñ lust erwecke.
Es wirtt auch nit möglich seyn (wie vor gesagt)
zu gedencen all deyn sunden/wehr auch on frucht/
die weyl du dein sunden ynn dyr/vnd nit yñ Christo
empfinde bist. Des nym hie eyn exempel/Lyner der
erkrumbt ist ann allen seynen gelidern/vnnd voller
schmerzlicher wunden vnd schaden/auch ynnlich
vnnd eußerlich am tod krank/was hilfft yhn/das
er seyn wunden vñ schadē ansicht/all seyn schmerzē
vnter schaydlich bedencke/vnd die umbstend seyn
krankheytt/yhm selbs fürpildet. Ihs bringt yhm
warlich keyn wegerung/aber vil mehr wirtt ehr be
schwert/vnnd seyn natur gekrencke/so er doch yhm

selbs nit helfen kann / also ist das lang gedencen/
vñ umbflochen / ynn vnsern sunden / nyenert zu güt /
daß das die armen gewissen mehr mit vnfruchtbarē
engsten beladen wirt.

Ist hierumb nott / das eyn yeder Christen / all seyn
sund / Christo / dem erlöser / yñ seyn wunde / todt / vñ
blutvergießen eynsetze / vnd do anschawē / wie er so
gar vnmltigklich / wider gottes trew vñnd lieb ge-
than hatt / das seyn marter vñnd todt an yhm ver-
lorē sollte werde. Vñ hiemit ungezweyfelt bedencke /
vnd glawb gottes barmhertzigem zusagen / wie wir
yhn dan vernehmen vnd glauben / ynn diesem sacra-
ment / als den vergeber aller vnser sund. So wirt er
wie der prophet Micheas am .7. von yhm sagen .
Zinnemen vnser vnrechtfertickeyt / vñnd all vnser
sund ynn die tieffe des meres werffen / dann so wyr
vnser sund ynn yhm / vnd nit ynn vns berewen / vñ
vertrauen yhm verharlich / ynn seynem gottlichen
wort / so nymbt er die sund / vñnd würffts ynn das
vnergruntlich meer seynen barmhertzickeyt / da soll
yhr nymer mehr gedacht werden. Alls er zugesagt
hatt / Ezechielis am .18. vñnd am .33.

Zum seitten fürnemlich / das die prob eyn ganzē / ges-
sicherten bestand widder des teuffells abfürer leer
hab / vnd der gewissen mit warheyt gnüg geschech /
so will ich dich / mit eynem worte all deyn sund / mit
allen vmbstenden leeren erkennen / vnd mag frucht-
barlicher nitt geschehen / dann dastu on frag / vnd
weytter erfahrung / dich schlechtigklich erkennest / yñ
allein deynem leben / ein armen sundlichen mensche /
der gottes gepot / vñnd willen / weder ynn begierde /

worten noch wercken/nie gehalten hast/du wärdest
auch nit fundē anderst/wen du tausent iar auß red/
vnnnd falsch behelff suchest/dan̄ das all deyn thun/
vnnnd lassen/nicht alleyn vnvolkomen/aber widder
gottes gepott sundlich vnnnd verdamlich ist.
Das kanstu vernehmen auß den Worten des heyligē
Pauli/gun Römern am .14. do ehr spricht. Was
nicht ist auß dem glawben/das ist sund. Also was
der glawb nicht durch die lieb/ynn dyr volbringt/
das ist alles sund. Nun sagt der glaub/deyn werck
sollent beschehen mitt solicher begierd vnnnd lieb zu
gott/auß ganzem hertzē/auß ganzer seel/auß ganz
em gemüet/vnnnd auß allen deynen krefftē/das ist/
das all deyn gütten gedancken/wortt vnnnd werck/
eyntrechtig/alleyn ynn dye eher gottes/vnnnd vmb
gottes willen/mit lust/vnnnd begierden/seelen vnnnd
leibs/geordnet/vnd volbracht werden. Wie vil du
der selbē werck/der gestalt gethan hast/wyrstu bald
gezellt haben. Auß dem grund volget/das sich be
klagt der heylig Johannes/an seynen ersten epistel
ynn ersten capittel/für sich auch für all heyligen/ynn
dießer zeyt/do er sagt. Wenn wyr sagen/das wyr/
nit sund auff vns haben/so betriegē wyr vns selbs/
vnnnd ist keyn warheyt ynn vns/vnd hernach volgt.
Wen̄ wyr sagen/wyr haben nit gesundet/so machē
wyr gott zu eynem lügn̄er/vnnnd ist seyn leer ynn vns
nicht/das sind ye gewelltig vnberwintlich wortt/
ynn denen/du nicht anderst kanst verstecken/dan̄ das
wyr/zu aller zeytt/sundlich erfunden werden/we
du woll erkennen magst/das der heylig geyst sie ge
sedt auß Johanne/vns weß zeit noch stund vgent/

Das wir vnß anderst dan sunder achten solle/wolle
wir anderst seyner gotliche warheyt nit verleugnen.
Hierumb on all weytter vmbsehen/erkenn dich/ynn
allen deynen wercken eyn sunder/do magstu nit fey-
len/deyn gewissen wirt auch nit betrogen/vñ wüßst
gott ynn der bekentnis/die höchst eer geben/vnd ist
dir versprochen/die vergebung der sunden. Wie der
Heylig Ioannes gleych auff die oben angezeygten
wortte spricht. So wir vnser sund werden bekennē
ist got getrew vñ gerecht/das er vnß die sund nach
laß/vnnd vnß rein mach/von aller vnser vngerech-
tigkeytt.

Also wirt volstreckt all vnser leben/das wir ynn
glawben verharlich bleyben/vnnd des glawbens
yebung stettigs behallten/ynn dem wir vnß sunder
erkennen/vnnd Christus vnß ynn der erkenntnis/all
sund vñ sunden reyniget/byß wir yhm ganz gefels-
lig zu seyner ewigen selickeytt werden/das nach ab-
scheyden vnnd bezallung des tods/alleyne vollendet
wirt.

Vnnd beschließlich ist das die ganz sum Christen-
licher gerechtickeytt/vnnd des waren glawben vol-
kommenheyt/das wir zu aller zeyt Christum yñ vns
lassen wircken die erlösung von sunden/dan hie ist
der recht verstande/das gott zugesagt hatt/durch
Ezechielem am. 33. do ehr spricht. So der sunder
seyner sunden mißfal treget/vnnd das gericht die ge-
rechtickeytt volbringt 2c. wil ich seyner sund nymer
yngedenck seyn. Was ist das gericht vñ die gerech-
tickeytt die also eyllents beschicht? Nicht anders/
dann das du dich selber erkennest ynn allen deynen
wercken

wercken (wie du byst) eyn armer sunder/ vñ besond-
derlich/ so dein gewissen mit angst der sundē geubt/
der sunden ledig wolle werde/ vñ dich achtest aller
straff vñ plag von got gemess. Das ist das heylig
gericht/ ynn dem du anhebst heylwertig zu werden.
Vñ dem nach volbringstu die gerechtckeyt/ wenn du
gott die eher/ die yhm alleyn zugehört/ ynn warem
rechten glawben vñ ungezweyffleter hoffnung/ zu
stellest/ so du yhm alleyn getrawest/ als dem/ der dir
deyn sund alleyn vmb seyn selbs willen vergibt. Vñ
also ynn dem gericht vñ der gerechtigeyt/ wärstu
vñnd deyn werck gerecht/ vñnd wolgefellig vor got
dem almechtigen.

Nun wollen wir die prob vñnd bewerung/ vñnd all-
igt gesagt leer summieren/ vñnd ynn eyn kurzen be-
schluß setze/ do mit wir gantz erfreut werde/ zu dem
tisch aller freuden vñnd wollusts/ selickliche zugeen.
Vñnd als eynē yden eyfeltigen ynn guttem Christens-
lichen gelawben wol zu thun ist.

Gedenck also du frumer Christ/ vñnd befestig/ das
auch on allē zweyffel/ so du zu got's tisch wilt geen.
¶ Almechtiger barmherziger got/ ich armer ellēder
sunder/ byn berufft vñnd geladen/ zu deynem hohen
kostreichen nachmal/ do du deyn eygner laib/ vñnd
heyliges blūt/ myr zu eyner speys/ vñnd zu eynem
tranc̃ hast genedicklich bereit. Nun erken ich mich
wārllich/ eyn armen vnwürdige sunder/ auch der we-
nigsten gnaden/ bey dir gantz vngemess/ ich glawb
aber anzweyffel/ das du alleyn deyn leyb vñnd blūt/
zu gegen mir mitteylst/ als eyn starck vest zeichen/
deiner warhafftigen zusagung/ wie du versprochen
hast dem sund/ der sich erkēt/ vñ seyn vtrawē alleyn
zu dir setzet/ seyn sund ledicklich zu vergebe/ wie ich

dañ ym glauben verhartlich on yrrung verstee/ das
der leyb/ den ich iez empfangē würt/ ist der leyb/ der
für mich hyngeden wart yñ den todt/ vnd das blüt
ist für mein sund vergossen worden. Ich weiß auch
wol/ das ich vnberet/ vnd dein nit würdig byn/ aber
so ich nit mag/ noch verhoff/ von meynen grossen
sundē/ durch meyn eigne rew/ beicht/ vnd püß/ auch
ynn keyner creaturen hilff/ oder macht/ gereinigt/ vñ
beret werden/ so glawb ich/ vnd beger von gantzen
meynē hertzen/ von dir gelediget / vnd gereinigt zu
werden. Vñnd darumb / das ich auch eyn armer/
ellender / vnwürdiger sunder byn/ wil ich zu dir flie
hen/ vnd dich empfabē/ das ich von dir allein/ meyn
ner armen zerissne gewissen rechtfertickē / trost vñ
rwe mög fynden/ vñnd das du ynn mir zu beleiben/
mich bereyttest/ nach deyne wolgefallen / hab auch
gar keyn sorg/ das deyne kressrigen/ lebendige wort/
warlich an mir armē sunder erfüllt sollwerdē.
Vnd also froleich/ woll getrost/ vnd gantz gelassen
auff den barmhertzigen/ getrewen got/ gee hyñ zu.
Vnd ob dir der teuffel eyn werffen würt/ die alt ver
zweyset yrrung/ als ob du nit nach notturfft beret
seiest/ so trit yhm trostlich auff seynen falsche / ver
lognen hals / vnd sprich. Gott ist meyn helffer/ bes
chirmer/ vnd bereitter / ynn den hab ich meyn hoff
nung gesetzt. Vnd darüb das ich gantz vngeschickt
byn/ vnd aller vnreinickeyt yñ mir eyn gewel befin
de/ auch mich die schwer bürde meynen sunden / ynn
meyner elenden gewissen truckt/ will ich dē leib essen
vnd das blüt trincken meynes erlösers Christi / ynn
dem mir warlich zu gesagt ist/ vergebung vñnd ab
lassung/ aller meiner sund/ vnd das mein glawb/ hie
vernewet / vñnd gesterckt soll werden. Also würt

ich beschaffen / eyn newe creatur / ynn meynem gott
vnd Herren Christo.

Jetz kan eror andacht woll erkennen / ynn dem wort
sanct Paulus. Das sich selbs der mensch probiern
soll / vnd wol bewert / hernach den leyb Christi essen
vnd seyn blutt trincken / vñ dye prob ynn keyner
menschlichen reu / beicht / odder pß besteen mag /
aber alleyn ynn der yebung des glawbens / wie an
zeigt / also das der mensch dem sacrament / seyn aus
wirkung vergynn / vnd Christo allein die eher geb
freyer vergebung der sunden. Vnd das ist / das der
heylig Paulus angeygt / wie vnterschiedlich gerichte
oddere gescherzt soll werden / der leyb Christi. Dann
wie kann man anderst richten / achten / odder vnters
chiedlich scherzen den leyb vnßers Herren ynn dy
ßem sacrament / dann alleyn ym glawben / krefftig
lich bedencken / warumb / vnd wo zu Christus seyn
fleysch vnd seyn heyliges blutt / vns zu essen vnd
trincken fürhellt. Darumben auch dz krefftig gepot /
das wir es sollen thuen ynn seynem gedechtnus / als
offt wir es thun werden / alle bereitschafft ganz
begreiff / dann die gedechtnys Christi / bey den güt
ten warhafftigen Christen / nicht anderst ist zu bes
dencken / dan das Christus vnßer herr / von got dem
vatter / ynn die welt gesand ist / durch seyn todt vnd
bluttvergießen / die welt zu erlösen / vnd selig zu
machen.

Wehr nun sich selbs / ynn sollichem glawben / vnd
auff mercken befind / vnd vertrauet vngeweyfelle
(mit recoendem hertzen / seynen sund) gott vñ seynem
krefftig wortte / der ist probiert / vñ geschickt / dz ehr

den leyb vnd das blüt des herren/nit zu dem vreyen
der verdammis/aber zu vergebüg aller seiner sundē/
vnnnd yhm zu ewiger selickeyt wirt empfahe. Das
verleich vns allen gott der vater der sun vnnnd der
heylig geyst Amen.

Vnterricht wye sich der from Christ / bey den
messen/so izt gehalten werden (wen er sich
nit mit gutem fūg darvō absunderē k̄ā)
halten sol/das ehr sich nit versunde/
vñ die zeyt nit vnnützlich verließ.

Auß dem ob angerzeygtem sermon /mag vernomen
werden/das Chr̄is vnser seligmacher ym sacramēt
gegenwertig ist/allein/das man yhn essen sol/vnnnd
sein blüt trincken/vnd so das mit georbtem glauben
offter geschēch/so vil mehr auch der mēsch im geist
ernewert wurd. So aber durch dē vnersettigen geiz
des Paps/ Bischoffen/pfaffen/vnd der münchen/
eyn hantwerck vnd teglicher kauff vnd handel/aus
der messz ist wordē. Ist auch auffgehebt die frucht/
vnd der war Christenlich geprauch/von dem hoch-
würdigisten sacramēt/vñ das gemein Christē volck/
gar ereussert vom tisch gotes/das mā nit mehr dan
eynfart im iar/vnter einer gestalt/dē Christē mēschē
zu lest. Das alles widerwertig der natur/vnd eygē-
schafft des sacramēts erkant wirt/hyerumb müssen
die fromen Christen / als die armen gefangen vnter
den vnmiltē tyrannē/sich gedulden vñ des teglichē
hymelschen brotes/also hungerig geraten. Darumb
auch ich yñ mein predigen oft angezeigt hab / dye
weil die messz gantz vō der ordnūg Christi gewent/
vnd mehr zu entheren got/an seynem eignen leib vñ
blüt dient. Es wehr vil weger ein yed fromer Christ

Lehm nymer zu der messz/ dan̄ das er der grossen yrrung mit seyner gegenwertickēyēt beistandt thue. So wir aber leyder die sache nit bessern mögen / vnd der geprauch am suntag messz zu hören/ das Christens volck engstiget. Ist von nöten den armen gefangen gewissen etwas lufft vnd trost zu reychen/ ordnung gebē/ wie sie doch etwas frucht bey der mess erlangē möchtē. Ist also zu mercken / das der leyb Christi vnd sein heyliges blüt geistlich vñ ynnlicher mag zu aller zeit vñ an allē stetten/ vñ dem Christē mensche geessen vñ getrunckē werdē. Als der herr sagt Ioan: am .6. Der do isset meyn fleisch vnd trincket meyn blüt/ der bleibt ynn mir vnd ich ynn yhm. Also wen du begereest ym glauben gegenwertiger vbung/ das Chrüs mit vollē gewalt seiner genadē/ yñ dir allein verharrlich bleib / vñ du mit deynem ganzen hertze vnd willē/ yñ seinem wolgefallē mögest besteen / ytz vndert so hastu geessen den leib/ vñ getrunckē dz blüt Christi/ dan̄ dz er yn dir vñ du yñ yhm also würdest bleibē/ darumb hat er seyn leib yñ todt gebē/ vñ seyn blüt vñ gossen/ Wen du dā zu der messen kumest/ dan̄ ist dir not/ dz du auff dē manigfaltigē mißgeprach der do gehalten wirt/ yñ singē/ klingē/ pfeiffen/ orgelē/ od̄ was do geschicht anders dan̄ Chrüs auff gesetzt hat/ kein auffmerckē habest. Aber nym dir ein vbūg ym glaubē für/ das du vñ deine got vñ herrē Christo geistlich erreichē mögest / das dir von menschlicher vnmitickēyēt sacramentlichen entzogen ist.

Erstlich gedenck also / Almechtiger barmhertziger got/ Hie bin ich bey deynē tisch/ der mir durch menschlich yrrung gespert ist/ doch glawb ich/ das yñ dem brott vñnd ynn dem weyn deyn heyliger leyb vñnd deyn heyliges blüt gegenwertig ist.

Sum andern/ glawb ich auch vestiglich/ dz du darüß

den leib vñ das blüt andich genomē hast/ Adam vñ
all sein nach kumē zuerlöse vō dem ewigen todt.
Zum drittē/ ich hab auch kein zweifel/ dz der leib in
tod für mich geben/ vñ dz blüt für mich v̄gossen ist
worden.

Zum viertē/ glaub ich auch/ dz in diesem sacrament
du gegewertig bist/ zubekrefftigē vñ zu bestettē deyn
warhafft zu sagen/ dem sunder sein sund zu v̄geben.
Zum funfften/ dz du allein hie dich selbs zu essen vñ
trinckē mitteilst allē denē/ die dz sacramēt/ in warem
glaubē empfabē/ yhre funde zu v̄gebē/ vñ dein gnad
vō newem an zu erhebe/ dz v̄mōgē dein wort/ die ytz
yñ der mess werden gesprochē/ als du gesagt hast.
Nembt hin vñ esset mein leyb/ der für euch hyngēbe
wirt. Nēbt hin/ trinckē mein blüt/ dz v̄gossen wirt/
zu v̄gebūg der sunden. Vñ diß betrachtūg muß der
Christē mēsch mit obenhin vberlauffen/ wie mā aus
dē betbüchlen on hertz/ vñ gedancē gelesē hat. Aber
mit ernstlichē hōhstē vleys/ yhm selbs bei der messen
einbildē/ vñ got im glaubē hertzlich vñ v̄treulich p̄t
ten/ dz er durch sein gegewertig gnadē/ dē glaubē al
so erhebe wolle vñ demnach/ so magstu dein begierd
vñ betrachtūg zu eynem solchem beschluß bringen.

¶ Allmechtiger got/ ich armer sunder bekenne/ das
ich mit fundē vberladē byn/ vñ beger vō ganzē hertze
meiner fundē ledigūg vō dir alleyn/ vñ als ich weys
dz die speiß deynes leibs vñ dz tranck deines blüttes
zu v̄gebūg d̄ fundē/ vñ mitteilūg d̄ gnadē/ yñ deynē
heiligē testamēt/ mir/ vñ allē sundern (ym glaubē zu
niessen) v̄ordnet ist/ bin ich des vō hertzen begierig/
Aber so ich nit zuleffig/ vñ vō mēschē v̄hindert wirt
pyt ich dich mein got vñ erlöser/ du wollest mich nit
lehr vñ hungerig/ heym lassen gen/ besund̄ mir ytz
dort/ nach deinē barmhertzigē zu sage/ mit teilē/ das

mir keyn mensch gebē noch nehme mag / das ich dich
geistlich empfach / vñ mir vgebe werde all mein sun-
de vñ warer glaub / hoffnūg / vñ lieb yñ mir auffge-
richt / gesterckt / vñ bestet / dz du allein in mir gewal-
tichlich regierest / vñ ich vnberuckt mit gāzē gemüte
vñ hertze yn dir bleib. Ich wil dir auch / mein got vñ
herr / yñ deine heilige wortē / gāz vngeweisselt glau-
bē / vñ als du gegewertig bist / die sundē zu vgebe / vñ
ich vor dir erscheinen / notturtig vñ begirig deiner bar-
mherzikeit. So du dā wilt gebē / vñ ich wils enpfa-
hē / so mag's niemāts wēdē / die frucht d messen / soll
yñ mir volbracht sein / Darūb allmechtiger gott sey
dir lob vñ eher ynn ewickeyt Amen.

Hie mit wil ich beschlossen habē / dz / wer mit gutem
fug sich vō dē messen ereusern mag / lasse ime nit not
darnach sein / dan wo dz sacramēt anders tractieret
wirt / dan wie es Chrūs hind ihm gelassen hat / wirt
got ynn seine eigne leib vñ blūt geuñert vñ gelestert.
Hierūb hāt dich fromer Christ / vor dē Requie / vñ d
Votivē / wiltu anders an dē leib vñ blūt Christi nitt
schuldig werden.

¶ Ach gott erlöß vns vom vbel Amen.

D. Jacobus Strauß / zu Remberg yñ saren. 6.

Augusti. Anno M. D. XXij.

Geirret yn etliche wortten / Lyß wie nach volgt.
Am erste blat auff d andern seittē in d 21 zeile / wo du
findest / billich / Lyß vñlleicht / Am andern blat / auff d
andern seytte yñ d 3 zeille / Lyß pfinstag. Am 3 blate
auff d erste seytte yñ on ein d letzte zeille / wo stet / vñ
christelichs / Lyß Christelichs / Am 4 blat auff d an-
dern seytte yñ d 19 zeille / do stet / vnchristeliche / Lyß
beschlepten / Am 5 blat auff d erste seittē yñ d 3 zeille
do stet / vñ ein halbe / Lyß vñb ein halbe / Am 10 blat
auff d andern seytte yñ d 9 zeille do stet / guttiger /
Lyß gnottiger. Wyttemberg. M. D. XXij.

